


文
檄

卷六



總制浙省文檄目錄

第六卷

捐資施藥

飭禁棍徒詐騙

查多徵白耗

再諭藥局

寬徵收漕白限期

禁漕白糧陋弊

申飭推收禁止加貼

實行落甲催徵

禁鹽捕為盜

嚴飭廠造漕艘

再飭實行官收官兌弁革倉歇

申飭監放兵餉嚴禁扣剋

嚴飭仁和清丁

革除南糧倉脚陋弊

禁革南糧陋規耗贈

緝拿放火奸徒

緝拿賭博奸徒

再禁江船勒索

舉劾文職

舉劾教職

舉劾武職

禁革嘉屬里書

禁飭詐害失主鄰佑

禁飭措畱起獲盜贓

歲暮通行停訟

申飭防範盜賊

賑恤貧生饑民

查議編立都圖名目

歲終禁飭夜行

燈夜申飭巡防

曉諭災免田糧

嚴飭緝拿槍奪兵棍

禁緝誑詐奸徒

酌議都圖字號

催議江干建亭事宜

再布告期條約

春汛申飭沿海

通飭修築隄防疏濬水道

申飭操練水師

通飭各屬詞訟

禁飭捕快私拷誣良

春汛再飭海防

勸輸賑濟衢屬饑民

措置獄舍事宜

禁比見年甲頭

酌頒易知小單

考試觀風

捐資施藥

為施藥濟人事照得今年異常亢旱酷暑傷人

况值饑饉洊臻民多憂患目下秋氣漸深之時

難免疾病發作在饒裕之家自能延醫調理本

部院慮及窮苦單寒之輩感患病症無力延醫

深可憫惻今特於佑聖觀設立藥局捐俸買藥

遴用明理醫官及好義士民董理其事俱按時

症酌定成方雇倩藥工配合現成丸散以便病

人隨便取用合行曉諭為此示仰諸色人等知

悉凡有偶患寒熱瘧痢等病家貧無貲不能延醫贖藥者或親赴藥局診視或凜人赴藥局明說症候卽時給與丸散依法服用自本月初十日開局起以四十日爲止彼時天道肅寒病者自愈其餘可無感冒之慮矣此係本部院濟人一念無知之輩不得混擾藥局致生事端自干咎讐未便

飭禁棍徒詐騙

爲嚴禁地棍勾合遊客詐騙地方以安民生事照得浙省連年水旱饑饉游臻惟賴有司各官鞠育撫摩與民休息乃有一種走空遊棍本非冠紳甲第居然冒遊客之名挾持綾刺書函習慣作抽豐之事或以邂逅而認爲親戚或以同姓而聯爲昆季或以白丁而稱爲年家或以假道而久戀不歸或以外省而冒稱祖籍借名關說影射招搖未從官府交遊先與棍徒締好因

而猾胥土棍之輩無不依附逐羶冀分餘潤竿
牘則代寫代投呈狀俱包收包准往往無事生
爲有事小事變作大事即使兩造願息此輩籍
制不休殷愚良懦墮其術中由是貧者賣兒鬻
女以應誅求富者破產傾家而填慾壑更加虎
狼棍役執券挾牌追呼逼迫瞬息難緩使賣鬻
妻女者不暇擇人變棄田房者無從問價地棍
勾合遊客害人一至於此真

國家之蠹螫百姓之鷹鷂也夫何有司各官受其
詐欺不查來歷止徇情面罔惜民艱甚有借名
影射彼此分肥者似茲擾攘紛拿吸膏捶髓無
怪乎民財日竭而地方大壞也本部院稔知遊
客抽豐久爲民害先經嚴示禁飭在案乃薦紳
士夫各俱愛鼎而此輩愍不畏死之徒詐僞招
搖不可方物甚至描模印信捏造僞牌假扮相
公攜帶僕從或公然結黨提人或設局拿訛詐
害如吳國士許其禎褚葵曹國昌等其人者何
莫非流弊之榜樣乎除見在拿究重處外合再

嚴行禁飭爲此示仰官吏士民及里甲人等知悉嗣後如有假冒遊客勾合地棍招搖誑騙指詐作奸者無論與受說事過錢之人談地方巡捕員役即便密訪確實連人贓一併嚴拿獲解以憑審實照光棍例

題叅分別絞戍治罪追贓里甲人等如遇前項棍徒私藏潛住者立行密報所在官司拿究每月將談里竝不容畱甘結繳送地方官存案倘居停寺觀容隱不首察出將歇家僧道一併連坐

地方各官須念今日如此荒旱百姓困苦已極務必加意撫綏着實休養倘遇此等奸弊不能禁緝仍與交通或被入首告徇情私縱不行詳解者俟本部院別有發覺定卽指叅重處斷不輕恕但不許官役借事生端里甲捏情妄首致于反坐之罪其各凜遵通毋違忽

查多徵白耗

為詳明白糧耗外加耗等事案據諛道呈詳湖
屬白糧五五耗米緣由到本部院據此隨批仰
候

總漕 撫院批示行去後日久未據呈報今新
糧徵收在卽難以久遲本部院復查全書開載
嘉屬每正米一石連耗并舂折等項准徵糙平
米一石八斗車夫等銀計算每石八錢及八錢
五分不等湖屬每正米一石連耗并舂折共准

徵糙平米一石五斗五升車夫等銀科算每石
共一兩及一兩零五分不等故當日
部文有嘉屬比湖屬多派米二斗五升湖屬較
嘉屬多派銀二錢有奇以二府銀米相較不甚
高下等語惟是糙米乃民納之數自應官爲春
辦今嘉屬計納正耗白米一石五斗五升除加
一春折米一斗五升五合聽還糧里是民自春
辦矣又餘糙米九升五合有零抵作解戶經費
之用自軍運以來是否糙米給丁應行查明至

于湖屬之糧全書明開每正白一石徵糙平米
一石五斗五升則無論官春民辦每正白一石
准算糙米一石一斗餘糙四斗五升又以四斗
四升春成白米四斗尚零糙米一升春成白米
九合淨算止諛正耗白米一石四斗零九合方
與全書相符不知何故歷年竟徵民納白米一
石五斗五升按全書定數以白計之是每石多
給白米一斗四升一合以糙米計之每石多給
糙米一斗五升五合矣卽據該道初詳議給白

米一石糙耗五斗五升猶是多給糙耗一斗茲閱再詳議給正耗白米一石四斗糙耗一斗五升是每石竟多給糙米一斗四升矣既與全書相悖小民多納何辜總之今日止是釐正全書之所無耳是議減全書之所有前此踵譌襲陋業已便益領運之官丁今後遵守全書何常偏袒納糧之百姓且事關

上供軍民一體舍不刊之成憲而不遵更有何說乎合亟查催定議爲此牌行糧驛道照牌事理卽

查歷年以來嘉屬白糧是否俱係里民春辦春折之一斗五升五合是否糧里除算不納耗餘之九升五合有零是否俱係徵給糙米湖屬白糧全書旣載共徵糙平米一石五斗五升因何竟改白米以致糧里每年每石多算糙米一斗五升五合再查舊例每正白米一石隨船折耗若干實上京倉正耗米若干各屬投諛道批廻作何開寫諛道投

戶部光祿寺批廻作何開寫每年奏銷清冊作

何造報逐一備細查明據實登答并關做蘇松
事例如何今應作何釐正以遵

欽定之全書以返從前之譌錯限半月內確議妥協
具文通詳以憑覆核會

題施行毋得違誤速速

再諭藥局

為曉諭事照得本部院設局施藥不過濟人一
念昨親臨局中目擊擁擠喧闐法未盡善因詢
所由聞有自矜體面之人不屑報名領票空手
赴櫃取藥者有本衙門及各衙門人役自恃在
官不肯循次報名領票者有老幼力弱婦女羞
怯挨擠不前者有路遠後至者有本非甚病受
人央倩而任意多取者且有強猾無賴之徒攬
票冒取出外售與老弱後至之人因而得錢自

肥者此等流弊甚非公平利濟之初心矣獨不思施藥治病因病取藥人我皆同有何不屑不肯之處又不思藥以治病病間勿藥惟已及物奈何有多取轉售之事乎似此人心不齊以致偏枯少濟在局中諸董事者既不便因做好事而固拂人情在本部院始事者尤不便因做好事而勉繩以法惟有委婉曉諭而已爲此示諭局中司事及取藥人等知悉嗣後到局取藥之人必須報明姓名住址患何病症登簿給票然

後次序進局或自病診視或代人取用約以一日服二服多不過三服而止若未全愈不妨改日再來要以得濟實用爲主蓋用藥人多配合費手若本日前去後空勢必至老弱後到之人跋涉空返而去甚可念也若有不肯報名領票者其人必係緩急無濟勿論士民衙役可以不必給與又或一人而索數藥一病而索多劑與夫取藥與票註不對者須要詰問明白酌量給之毋致有恃強奪票轉售之弊議者將曰施藥不

過吾盡吾心何必分別計較將無蹈悔吝之嫌乎殊不知謀事貴徹始終利濟期于實際此中尚有各僚同志捐貲者在焉統俟事竣通知嗟乎人人而濟昔賢所難于本部院何有哉其各諒之

寬徵收漕白限期

為酌寬徵糧限期以甦民困事照得浙省昨歲水災今年奇旱民生困苦已極本部院業將各屬旱蝗災傷情形會疏入

告俟勘定受災分數籲

請蠲恤外惟是漕白二糧徵收限期近行八月開倉九月徵比十月徵足候兌往年多有糧長糴米上倉以致管糧官役米牙人等追呼勒索大為民累是以本部院上年曾經給示寬期在案今

里民積苦之後田禾枯槁者方在救死弗遑卽
得雨獲甦者稻穀在田未穫若照漕運限單必
致糧里重困頃已會同

撫院特疏具

題請於十月初旬開倉中旬徵比十一月完足俟
部文到日另行通知合先給示曉諭爲此示仰
諛屬印糧官役糧里人等一體知悉今歲漕白
二糧俱于十月開倉自中旬起至十一月終止
分爲八限徵收按數完納如有未示之前已經

開倉者俱且暫停徵比倘有官役故違追呼勒
索等弊定行叅拿重處不貸此係本部院寬恤
災民至意爾各糧里若至分限徵收之時務須
照額上納以便旗丁受兌無渝冬兌冬開之例
萬勿貽累印糧各官考成自取刑比之苦本部
院蒿目民艱雖現在仰懇

皇恩務期多方蠲卹但係年額秋糧不得不設法甦
民諄諄相告爾等其各諒之

禁漕白糧陋弊

為嚴禁漕白積弊以甦民累事照得浙西賦重
役繁閭閻困瘁加以連年水旱頻仍民不堪命
糧里惟正供輸尚且不免竭蹶之苦為民上者
若不加意軫恤一味橫斂私徵勢不至小民剝
肉竭膏不止本部院蒿目民艱是以上年曾將
徵糧陋弊開列條款痛切示禁在案今歲旱災
情形本部院先經會疏入

告俟勘定受災分數即便援例題

請蠲卹又慮開倉徵糧限期舊時定例太早疏請改
于十月開倉徵收業已通行曉諭外惟是漕白
二項乃屬年額秋糧關係

天庾上供不得不遵例徵收以副冬兌冬開之限查
漕糧每正米一石加耗米四斗內除一五耗米
例不加截其正米及二五耗米每石徵貼截頭
銀三錢七分有奇以爲運丁置辦船中什物及
沿途起淺水手工食等費項准

部文查議見行藩司糧道酌減俟具

題之日另行通知至于永減備料灰石輕齋等銀

雖係漕項錢糧俱在地丁內一例徵收其白糧
照由單內載經費丁字沽雇剝銀與耗贈舂折
之數此外竝無絲毫使費勺合加耗名色糧長
照額全完卽令歸農務業至于兌米上船皆係
印糧官吏責成俱與糧長無涉在糧里免守候
耽延之苦在運丁亦無從肆其刁難勒索之計
所謂官收官兌不易之漕規也但訪聞向來奸
胥蠹役倉歇橫丁狃于積習朋比爲奸凡值糧

米開倉徵兌之時此輩坐定里畝每糧長一名
先索修倉鋪設舊例年規及納米完截擅立私
斛大等橫勒加贈耗餘又有倉歇人役需索分
例抽豐看覈飯米張袋做斛出兌等項擁擠倉
廩羣聚需索稍若不遂或借銀色低潮復令傾
鎔或稱米色不堪勒令駁換甚之稱彈高下量
斛重輕淋尖踢斛等弊任其操縱挾之必從及
至糧長照額交完又復指畱看倉承值與旗丁
親行交兌張筵設席講議私貼講論一日不定

則糧米一日不兌糧長之需費一日不休小民
完米一石有至一石四五斗完銀一兩有至一
兩四五錢不等者以致彼此貪戀故不開行有
誤

正供苦累糧里皆由官收官兌之法不能力行及猾
蠹恣意需索之所致也當此民窮歲歉之時豈
容如此侵削除一面責成印糧各官互相覺察
仍差員密訪有犯必究外合行出示嚴禁爲此
示仰官吏軍民人等知悉今歲徵收漕白錢糧

務遵本部院上年告示條款及今次禁約俱于
十月開倉自中旬起至十一月終止分爲八限
徵收聽糧里按數完納米則乾潔滿斛銀則足
紋官法隨納隨收官給印串收執不許擅自差
役下鄉致滋擾害及苛索前項使費陋規倘有
頑戶抗違逋欠者止許發票交付糧長拘比如
已經完足者卽令歸農不許仍畱看倉承值其
米俱聽印官交發旗丁上船依期開行毋得遲
延濡滯敢有陽奉陰違濫差滋擾私加耗費如
前所指諸弊或經訪聞或經告發定將該管官
先拿後叅旗丁立正漕法胥役倉蠹人等嚴拿
處死斷不輕恕凜之慎之

申飭推收禁止加貼

爲飭催產業推收以速編審事照得產業授受
契券分明不許勒索加貼先經本部院通行禁
飭在案茲當審編里役之時正是過割推收之
際乃聞有等奸險刁徒售產久明指不推付勒
加貼費任意延推以致里書目爲奇貨可居百
般需索縣官又復因循膜視不肯官收加以訟
棍扛幫衙役串詐不特買主爲之魚肉甚至編
審因而廢停此等刁風南方爲甚而省城則更

甚也合亟嚴飭爲此示仰府縣印官及士民人等知悉凡有新舊田房產業交易已明者俱卽尅期推收過付以便按產定役不得仍前耽延刁措倘有賣主不肯推付而買主具呈求收者縣官立刻行票知照諛里過付明白不許經承里胥任意遲延索受賄賂或有刁惡賣主及訟棍窮憊疎遠親屬之類捏詞誑控者各諛衙門務須從公審結不得任意徇濫輒斷找貼致啓覬覦之端自示之後敢有故違及衙役里書生

情詐害等弊許被害士民據實指名赴本部院衙門呈告以憑從重法懲決不輕宥諛管官藐玩徇縱者輕則記過重則叅處各宜凜遵毋忽

實行落甲催徵

爲實行落甲催徵之法革除見年糧長之名以清錢糧以蘇民累事照得邑有里呂里分十甲向有見年糧長之名使之輪流值役催辦各甲條銀糧米原欲禁絕差擾休息里民前人立法之初意非不善夫何日久弊叢縣官昧于講求胥蠹因而肆虐凡遇里民輪當糧見之年全里銀糧俱責一人催納其間公直饒裕依限輸將者固不乏人而奸猾亡賴恃頑抗逋者亦復不

少致使見年獨任追呼枉受鞭扑加以差胥詐
索賂賍難支彼狡黠頑戶方且秦越相視漠不
關心也更可異者每遇地方事務如軍需夫草
火盜逃亾人命等項事出不常風吹草動無一
不于見年是問是見年一身供官役之誅求代
頑戶之賂累橫罹刑罰廢業失時安得不蕩產
傾家流離死徙乎案查歷任

各院頒置滾單兼行落甲徵催之法其催納錢
糧則專比欠多頑戶不比見年若一切地方軍

需不常之事俱與里甲無涉此誠剔弊蘇民之
良法也但官役陽奉陰違者有之奉行不善者
有之今當編審大造之時尤宜加意更始務期
力行爲此示仰印糧官吏糧里士民人等知悉
嗣後諛縣里甲人戶應徵田地條銀糧米每年
查照赤曆將科則銀米數目刊給易知長單分
發各甲人戶凡遇徵納日期聽各戶照限自行
完納如人戶能依期按數完櫃上版者諛管糧
房卽時註明坐簿給票歸農不得畱難過卯措

文榜
卷六
索陋規其有抗欠頑戶遲延不納者縣官卽發
火票摘追若摘追仍抗者方許差提赴比雖完
必責以警抗違各甲內有役少者數人朋合彼
此輪流甲總止管單票傳催不代頑戶比較如
係一人獨甲則自完本名銀糧不必人催亦不
催人尤屬簡便至于從前每歲派值見年糧長
名色盡行革除凡有地方公私諸事俱應官役
自爲料理一概不許差派承值敢有官蠹故違
禁約仍前責成糧見者或不行摘比頑戶溺比

已完甲總者或謂簡明長單零撒里民易于欺
瞞多開毫釐勾合者或踵前陋弊胥役科斂各
甲使費及仍差皂快等役坐圖索擾者有一於
此許被害里民指實赴告定將貪官蠹役立行
叅拿究罪斷不姑恕爾糧里人等當思此乃補
偏救敝之法務將各名下應輸銀糧遵限按數
完納以免摘追提比之煩倘有仍前恃頑觀望
抗欠不前者旣無糧見推諉勢必印糧官指名
通申繩以抗糧

文教
卷六

新例彼時悔之晚矣各宜凜遵毋得玩忽

禁鹽捕為盜

為嚴禁鹽捕為盜查叅縱容失察官員以弭盜賊事照得浙西杭嘉湖一帶盜賊行劫多係駕船放銃持刀挾矢之徒夫民間不許私藏兵器久經禁飭在案則此銃矢器械何從得來乃聞廳縣等衙門設有鹽捕一項此輩原係不耕不織遊惰無賴之人諛管官不查來歷朦濶收用一給腰牌照票便為護身之符公然糾結匪類列械揚舩名為巡緝私鹽實則為非作歹在地

文楊
卷六
三
方文武以爲官捕畧而不問卽應補兵役亦因
官捕莫之敢櫻以致糾駁劫財橫行無忌此皆
溺職官員失于覺察容縱養奸所致業有奸徒
已經發覺現在嚴查特叅外合行嚴飭爲此牌
行運都二司及杭嘉湖道府州縣照牌事理卽
將所設見在鹽捕嚴加查禁如有來歷不明形
跡可疑者立行斥革仍取五人互結并該管官
印結備造見役花名文冊呈報查考倘別有發
覺以憑據結

題叅互結各役連坐治罪畱用各役諛管官不特
密訪飭禁敢有仍前徇庇縱容者本部院別有
訪聞定行從重特叅請

旨革究不貸慎之毋忽

嚴飭廠造漕艘

爲禁飭廠匠侵冒錢糧以重糧運事照得漕白
二糧乃

國儲玉食所係自南運北必藉船隻裝載其間渡
江涉河經洪過閘關係綦重所以浙省漕船每
隻額銀二百八十餘兩又將舊船底料貼用約
給三百餘金必須成造堅固方能經久無虞無
如浙省向有一班光棍蟠踞仁錢二廠名爲廠
匠每年預探額造漕艘數目通同諛管胥役多

方寅緣謀委成造將額設錢糧恣意侵吞彼此分潤及至定廠打造之際又挾制運軍額外指勒旗造幫貼銀數百兩不等卽如前歲之張雲堦是乃明證甚有假借漕船名色或封估民間樹木或強買舖行物料或白役各匠幫工種種不法難以枚舉至所造船隻復又工疎料薄不堪裝運是以旗丁年年拆造處處艙修運務疲壞悉由於此除見在委官查驗并密訪拿究外合再禁飭爲此牌行糧驛道照牌事理卽便轉

行仁錢二縣及監兌督造漕船各官遵照今年額造船隻務將應用物料確估實數照時官辦鳩工打造經久載運歷險無虞不得聽憑奸棍冒侵錢糧指勒幫貼虧累行戶詐害軍民及徒事粉飾致貽損失之患倘不力行監督仍蹈前轍或經本部院訪聞或委官查驗得實定將督造各官立時叅究并嚴拿棍蠹一併盡法處死斷不姑恕各宜凜遵毋得違忽

再飭實行官收官兌并革倉歇

爲禁革倉歇以肅糧弊事照得漕白二糧官收
官兌久有定例若果實力遵行凡民間上納糧
米一如條銀完櫃之法軍民兩不見面何至有
橫索刁難之弊乃歷年錮習牢不可破總由一
班積惡奸歇從中作祟凡諛管官役運弁旗丁
無不勾通若輩肆其鴟張在若輩亦必假手官
蠹弁丁魚肉糧里以致小民輪值糧長無不視
爲畏途雖從前屢經示禁無如奸詭百出巧換

名目或稱爲區甲或稱爲聯夫或稱爲火夫或稱爲看倉人役而總不外倉歇二字詐索公行恬不爲怪當此水旱頻仍民生困苦之際正供尚且艱難額外豈堪腹消除見在訪拿究治外合再嚴行禁革爲此牌行糧驛道杭嘉湖三府照牌事理卽便轉行徵兌漕白二糧各州縣將今年漕白二糧責令諛印官督同糧官實行官收官兌之法凡民間上納糧米驗明米色隨到隨收收完給票卽令歸農毋得稽留時刻任憑

蠹棍乘機鼓弄借各科斂至出兌之際總不許一人進倉干預糧務致滋弊端諛道與監兌官仍加不時稽察如有奸胥棍徒仍前指留糧里及勾引諛管漕糧人役領運旗丁通同科索彼此分肥者許被害樞實呈稟諛管官卽時具文轉報以憑嚴拿盡法處死斷不姑宥通取遵依及印糧各官不致扶同容隱甘結呈繳查考毋得違忽

申飭監放兵餉嚴禁扣剋
爲酌議散餉之法等事照得兵丁戍守巖疆全
藉月餉以資膳養向有不肖營弁借名扣剋任
意侵吞是以 前部院條議凡領餉到營會同
該地方文官當面分給取具文武各官及兵丁
不致扣減結狀繳查如文官瞻徇通同隱飾知
情不舉或經被害兵丁告發或別有確訪真聞
文武一體糾叅等因奉有

俞旨通行欽遵在案近聞法久玩生營官公然指派

凡一切禮節及衙門往來日用攢造冊籍領餉
路費以及查點供應等項無一不于兵餉扣取
及至會同散餉之時反加派一番交接文官使
費文官既與武官親昵焉得不爲狗庇每於放
餉後不過具一甘結了事見經本部院訪實糾
叅者有之兵丁告發查審者有之豈非通同隱
諱之明驗乎除見在行查叅究外合行通飭爲
此牌行監放兵餉各衙門照牌事理如遇諛營
領餉到營一面查取見在馬步戰守兵丁實數

并應扣小建截曠朋椿等項銀錢外實在每兵
應給餉銀若干搭給制錢若干大書告示曉諭
諛營各兵訂期會集公所驗明銀錢足色足數
逐名唱散取具諛營兵目將領甘結并本官印
結一併呈繳查考如諛營捏報兵數及借名暫
畱候發等弊卽行揭報以憑嚴究叅處又汛防
寫遠例應委官會散者亦必查明確數一體出
示知照仍嚴飭委官潔己奉公不得虛應故事
倘有仍前狗庇或私受賄囑通同隱諱者一經

發覺定將會散文職同諛營官一併
題叅重處斷不姑宥

嚴飭仁和清丁

為嚴禁借端科派以杜陋弊事照得仁和縣新
增人丁一項大為軍民積累本部院蒞任之初
曾經檄行清查隨據藩司詳稱諛縣共報新增
人丁三千七百一十六丁內派在城民畝九里
四百四十四丁軍地七所三千二百七十二丁
續將民畝搜補外實派軍地七所二千四百三
十一丁今查七所新丁內有應成丁者止二百
一十九丁無庸議外其餘俱係孤老廢疾死亾

異鄉浮居及既納民畝復報軍里并流移遷去
有姓無人不應納丁者共二千二百一十二丁
應俟編審之年將該縣通里人丁嚴行清編必
有餘丁着落然後將軍地七所虛丁二千二百
一十二名竟行開除等因當經本部院批准於
來歲審役時執法秉公遺漏者按丁編徵虛加
者概行除豁不許纖毫滋弊如有故違定將官
役叅拿重治不恕仍先行曉諭各里知悉等因
飭批在案茲當編審清丁之期訪有走空奸棍

充作里書團保總甲串通該縣糧房蠹役借口
免丁各色每所科索銀四五十兩每一戶勒輸
一年之丁銀作爲公費方許開除丁名列單傳
催公然指派不意省會之地狐鼠橫行魍魎晝
現乃至於此除見在訪實拿究外合行嚴禁爲
此示仰官吏士民保甲人等知悉示後照依藩
司詳議事理將該里人戶逐一查明實有產業
及應成丁者從公僉補開明年歲造冊送縣通
報查考其有從前混報老疾遷故并已納民里

重複報丁者今次盡行豁除不得畱難指阻敢
有奸棍蠹役愍不畏死仍前借端科索或暗埋
貧戶或詭捏姓名希圖影射者一經訪聞告發
定將該縣印官以縱蠹害民特疏

題叅革問弁先拿蠹棍奸徒立刻盡法處死斷不
輕宥

革除南糧倉脚陋弊

爲禁革借端科索以杜賠累事照得省倉收貯
各屬南米放散滿漢旗營兵糧向雖設有倉書
倉脚等役不過登記米數及搬運進倉以免管
解官役濡滯費累之意也今訪有奸猾積棍夤
充盤踞串通諛管經承省歇朋比作奸每一縣
解米到省必先將官胥分例以及倉內倉外馱
米做斛巴倉張纒鋪設篋墊氣筒禾草并投批
掛號等項件件講定勒索到手然後收米進廩

若稍不遂慾必不解收任其露積道左風雨飄
零經旬守候上兌無期卽或准收亦必故嫌米
色不堪任意篩颺淋尖踢斛無所不至以致掛
欠正米畱批不發管解官役只得隱忍賠補要
之解米官役何嘗將自己貲蓄代爲賠墊總不
過取償于百姓所以民間完糧惟此解運南米
無不視爲畏途際茲災稜頻仍之後本部院愧
不能盡罄鴻而集諸野澤豈容此碩鼠以食我
黍禾合行禁革爲此示仰省倉官吏及管解官

役人等知悉凡各屬解到南米務須隨到隨收
公平斛兌馱運進倉需用脚夫聽憑解米官役
隨便雇募其原設倉脚等夫名色一切盡行革
除毋得仍畱滋弊敢有管倉經承胥役仍前濫
派陋規科索耗贈及故意刁難不卽收兌或侵
漁盜賣對支折乾等弊一經訪聞告發立刻嚴
拿蠹胥盡法究治仍將經管官以縱蠹科斂特
疏

題叅重處决不輕宥

禁革南糧陋規耗贈

爲禁飭南糧徵解陋例以甦民累事照得浙省南米俱充各諫府兵食及解運省倉支給滿漢官兵月糧之用例係官收官解所有夫船脚耗額載定數不許私加耗贈久經嚴禁在案無如各屬積習相沿每至徵解之期多係一班包頭積棍串通衙蠹表裏爲奸名雖官收凡淋尖踢斛墊倉鋪設篩颺黥耗會籌洗澡等項無不立一名色名雖官解凡往來夫船裝運叉口盤剝

塘壩投領批迴無不定一分規甚至串通營弁
擅立私票分發各里對支月糧縱兵沿鄉需索
通同譌詐民間輸一石正糧約費一石貼耗當
此饑饉游臻之後小民正供尚苦拮据難完額
外陋規豈容無窮朘削合行禁飭爲此牌行布
政司各府縣照牌事理卽便轉行嚴飭各諛屬
將諛縣南米照額及時收貯聽候撥解毋得任
憑糧官縱容蠹棍巧立名目私勒耗贈及折乾
對會等弊敢有仍前不法冥行罔忌勒索累民

者或經本部院訪聞或被害告發立將諛縣印
糧各官特疏

題叅究處并先拿蠹棍盡法重治决不輕貸

緝拿放火奸徒

爲嚴拿放火奸徒以安地方事照得省會人烟

稠密比屋連居當此隆冬之時火燭最宜謹慎

今聞有奸惡棍徒三五成羣夜聚曉散通同地

棍專一打算某家素封某家殷實小則鼠竊狗

偷大則糾夥搶奪尤可恨者攜帶阡張木梯枯

竹乾柴及油蠟引火之物每於夜靜更深或安

置人家門首或撮放低矮飛簷意在縱火焚燒

乘機劫奪財物夫穿窬偷摸所害不過一家若

放火延燒一方皆受荼毒其設心險惡較之強盜尤甚除檄行地方官設法巡拿外合再示禁爲此示仰地方官吏士民里甲人等知悉嗣後如有奸惡棍徒帶取引火物件希圖點放害人者或地方里甲捉拿或鄰佑覺察呈報或巡緝員役搜擒或行路之人撞獲立即解赴本部院轅門以憑盡法處死必不姑貸

緝拿賭博奸徒

爲緝拿賭博奸徒以安地方事照得盜賊叢生多由賭博而起欲靖地方必須首禁賭博本部院屢經告誡不啻萬分嚴切其如愍不畏死之徒怙惡迷心終無悛改近聞民間仍有結連營丁在於內室高樓深藏窩賭者有無耻劣衿以書館爲賭場者有反鎖門戶暗藏賭賊在內者有于內房窩賭故令妻女守門肆其刁悍者甚有大膽營丁以及投誠兵廝身藏賭具潛於冷

街僻巷人家門首或廟宇神祠隨地賭博以逞其詐害搶奪者地方印捕外巡等官付之不見不聞里保總甲捕役莫不通同徇縱以致此等奸徒肆無忌憚因而賭極爲盜無惑乎地方之不得寧靖也言之實爲可恨今本部院自差職官訪拿究治外合再飭諭爲此示仰官役兵民里甲人等知悉嗣後各地方凡有賭博之人以及窩賭之家許諛坊里保總甲鄰佑及坐坊應捕執住賭具籌錢報明諛縣拿究如係民人卽

照例擬罪具詳如係營丁弁投誠兵廝卽解赴本部院親審重究如係滿營兵丁候本部院帶赴公衙門會同

將軍副都統照例處治有經傷人首告者必將諛地方里甲人等連坐究罪如係本部院自行差官拿獲必將印捕各官照失察例特疏糾叅斷不姑恕但不許衙役里甲借端騷擾及刁惡棍徒捏情誣首有一於此定置重典各宜慎之毋忽

再禁江船勒索

爲再禁渡船勒索多裝以杜詐害以重民命事
照得錢江渡船係浙東往來要道向緣不法稍
子惟利是圖凡遇商民過往先拉行李貨物在
船挾以不得不載之勢及至過渡半江停橈橫
索脅以不奪不饜之威更有貪惡船戶不行量
船裝載不至人擠滿船斷不開行兼之奸棍冒
營恣肆搶奪以致過渡之人爭先滿載失事頻
聞先經本部院嚴示禁約在案今聞舊習復萌

當此隆冬雨雪之時風潮不測之險倘有疎虞
沉溺貽害不小除冒營奸棍搶奪兵廝另行發
牌差官巡拿外合再嚴示禁飭爲此示仰官吏
商民船戶人等知悉嗣後過渡商民所給渡錢
遵照前示每人給錢五文行李不給每貨一擔
給錢五文貨多人少者每貨一擔給錢八文此
外不許多勒每大船一隻約裝二十五人小船
一隻約裝十人如裝貨一擔無論大小船隻俱
算一人敢有貪惡船戶不法棍徒惟圖多得船

錢搶貨拉人半江勒索多裝滿載者或本部院
訪聞有據或差官巡拿得實或遇有沉溺之事
定行鎖拿從重究處斷不姑貸

舉劾文職

為薦舉必不可停事案准

吏部咨前事等因到部院准此先經通行遵照
在案為照舉劾官員關係黜陟自應秉公執法
以昭勸懲今扣至康熙十一年三月內例應舉
行合就通行確查為此牌行通省各道府照牌
事理即將所屬方面有司教職佐貳等官密行
查訪某官應舉某官應劾應舉者必查其平日
操守如何清廉日行政事如何勤敏任內錢糧

盜案有無未完粘帶行過事實果否堪列薦剡
凡興利除害釐弊剔奸良法美政務必實有可
紀不得浮詞揚詡任意鋪張亦必賢能素著輿
論共推者方許據實開報萬勿以平常庸劣之
員朦混充數其應勅劣員亦必廉訪真實或貪
黷不法行事乖張或暴戾恣睢酷虐任性或闕
茸無能悞公慢上或疾病龍鐘尸位廢事以及
私徵橫派縱蠹殃民等事開具劣蹟密揭固封
一呈布按二司兼轄道員一呈本部院與

撫院以憑會核定奪不得黨庇大僚而以微員
塞責亦不得捨貪惡劣行而以微疵點綴定限
正月十五以前送齊不得遲延當此

功令森嚴之際若濫舉匪人或有一舉無勅希圖市恩
比匪等弊經本部院覆核得實定將諛道府列
入應勅數內叅處不貸

舉勅教職

為薦舉必不可停事案准

吏部咨前事等因到部院准此先經通行在案
除方面有司佐貳等官另檄行查外為照教職
官員為士子之表率關文教之隆替其中勤慎
好修者固不乏人而隳窳廢職者亦復不少今
至康熙十一年三月例應舉勅合行確查為此
牌行藩臬二司提學道照牌事理即將所屬教
職等官逐一查訪應舉者必核其平日操守如

何清廉文教如何修舉考課士子果否勤敏無
斃表率士風是否訓迪有方學租錢糧有無未
完粘帶履歷年歲是否強壯英齡以及諛管生
員有無劣行緣事抗欠錢糧等事務擇廉謹自
持學政興舉輿情允服士論咸推者方許開列
呈報以憑會核定奪不得借端鋪張浮詞誇詡
其有怠玩職業年老龍鐘病廢無能貪婪不檢
者廉實劣蹟密揭開報以憑叅劾不得徇庇定
限正月望前取齊萬勿遲誤倘有舉無劾或濫

薦匪人本部院別有訪聞于諛司道大有未便
慎之毋忽

舉勅武職

為武臣薦舉亟宜舉行等事案准

兵部咨前事等因到本部院准此先經通行遵

照在案為照武臣之設所以馭兵衛民固圉息

警是責任綦重而簡練宜精也今既奉有照文

職一體舉勅之例定於康熙十一年三月內舉

行自應執法秉公嚴行查察以昭勸懲為此照

會各鎮牌行通省各協營照依事理即將所屬

弁員密行查訪某官應舉某官應勅應舉者必

查其技勇弓馬如何嫻習優長分管汛地如何防範謹密營伍兵馬如何整飭訓練兵民共處如何綏輯相安給餉散糧如何實支實給所屬隊伍如何無冒無虛年力如何強盛膽氣如何雄壯紀律如何嚴肅凡廉能功績必須實有可紀不得浮詞揚詡任意鋪張經手錢糧盜情務須毫無粘帶不得遺漏其應勅劣弁或溺職敗檢貪恣不法或隳棄紀律縱兵殃民或弓馬生疎老弱怯懦或防禦怠玩失事疎虞或借名使劣蹟密揭固封一呈本部院一送提督以憑會核定奪毋得庇將領而以偏裨塞責不許寬貪暴而以小過點綴定限正月十五日以前送齊勿致遲誤當此

功令森嚴之時若濫舉匪人或有不舉無勅希圖市恩比匪等弊經本部院覆核得實定將諛將列入應勅數內叅處不貸

禁革嘉屬里書

爲禁革坐里頂首以除積蠹以甦民困事照得
民間田畝輸納條糧自有刊定易知由單并該
縣核算赤曆昭然可考豈容蠹胥上下其手包
管作奸頃據士民條陳備言嘉屬里書播虐較
他處爲特甚夫邑中有里里中有書不過擇見
在之糧里充版圖之書算耳乃今私立坐里名
色各邑有頂首數至二三百兩不等者惟嘉秀
一二邑價值千金初猶不肖地棍夤入其中近且

豪猾劣衿竄爲窟穴甚有積年衙役而改充里書亦有身爲里書而兼充衙役凡里中之條丁糧米一權掌握多寡聽其指揮科上加科則上加則卽有明于計數之人以爲里書算定莫可如何更或交通官蠹打合分肥種種條目項項陋規一言卽爲成例片語孰敢不從甚至里中戶婚田土鬪毆事情原告被告必須聽其打點主謀田產交易子女婚姻爲媒爲保非蠹不容成交聯屬稍不遂意無中生有不風起波借題

詐害無所不至城狐社鼠相習成規此輩坐擁富貲父傳與子兄傳與弟官府以爲在衙役之外畧而不問不肖有司方且藉其箕斂容縱養奸嗟此小民奚堪供彼魚肉哉合行嚴禁爲此示仰諷地方官吏士民人等知悉嗣後民間條銀糧米俱照易知由單縣算赤曆照額輸將且現行滾單落甲之法已無糧長見年之名其里書頂首名色盡行革除勒石永遵敢有仍前設立頂頭如前所指種種情弊或訪聞得實或首

告有擬定行嚴拿惡棍奸徒盡法究治諷管府
縣官不能覺察卽以縱奸溺職叅處不貸各宜
稟遵毋得泛視

禁飭詐害失主鄰佑

爲禁飭詐害失主鄰佑以除盜根以蘇民累事
照得靖盜安民爲地方文武諸員專責一遇強
竊盜賊生發自當竭力追緝獲盜正辜以盡一
日守土長民之職兼贖平時疎防失事之愆至
於事主鄰佑失物受驚備極慘苦爲民上者惟
有撫卹安慰確詢情形卽時省釋以俟質盜領
贓而已乃今日浙屬各官憚于叅罰諱盜成風
一擬失主地方呈報失事卽將原報之人視爲

文樓 卷六 第
寇讐或妄令改強爲竊或威勒諱盜爲仇稍不
仰承意指非歸咎失主慢藏卽苛責隣佑不救
呵叱怒罵無所不至有先施刑責示威者有着
令失主緝盜者亦有承緝兵捕需索詐害者甚
有故意提訊老穉婦女及妄指鄰佑與事主之
家人親戚爲盜拘拿刑拷者失賊遭官吞聲飲
恨而彼積猾盜賊窺破心事恣意飽颺以致已
犯者不妨再舉未犯者往往試嘗無怪乎盜根
難除而盜風日熾也究竟文武各官不過爲保

全自己功名起見乃其流弊遂至叅盜殃民試
令清夜捫心卽使目前暫逃叅罰而天怒人怨
鬼譴神殃其能前程永吉乎本部院與言及此
蓋不禁切齒恨而更撫心悲矣除嗣後有犯必
懲外爲此牌行臬司各道府縣并示諭闔屬官
吏士民人等知悉凡遇地方呈報強竊盜賊事
情務須遵照屢飭定例立刻窮追捕獲通報查
奪不許遲延疎縱其失主鄰佑卽于呈報之時
詢明情形去向取具失賊細單并問曾否見有

盜夥確數卽行省釋寧家俟日後起獲真贓止
許傳喚失主一人識認真假認明之後亦卽省
釋不許羈畱押保敢有仍前威勒事主改強諱
盜拖累株連如前所指諸弊或本部院訪聞真
確或呈報招詳閱實或被害告發有據定將不
法害民官員立付白簡經承提拿處死必不輕
貸

禁飭指畱起獲盜贓

爲禁飭指畱起獲盜贓以杜勒索侵隱之弊事
照得民間貲財衣飾等物以辛勤得之錙銖積
之不幸一旦被盜搶失其事亦甚苦而情甚可
憐也所以律例起獲盜贓俱給失主收領如有
花費無存者又將盜賊家產妻孥變賠及查本
案無主贓物抵數無非從憫恤失主起見乃今
訪聞印捕官員凡遇起獲原贓雖經識認明白
仍要勒追貯庫其間看守經承勒詐使費起獲

捕役需索銀錢更且抵換侵漁遺失過半迨至上司批令給主或經部文給發償還猶然借端勒索不饜不休此種設心真不知民間疾苦者矣除通行各衙門嚴飭外合再示知爲此示仰闔屬官役士民人等知悉凡從前強盜竊賊各案起有原贓曾經事主認明者立即盡數查出通行給發各取領狀報查嗣後凡遇起獲盜贓一經失主認明立即交還原主聽其領回仍明立文案備考如有疑似不認者方許存查覆詢其無主贓物與抵變盜妻財產遵照定例分別按數賠償失主其餘入官敢有仍前稍畱不給需索勒索抵換侵隱等弊或本部院訪聞得實及閱招詳有據或被失主告發定將該管官員特疏

題叅經承蠹役按贓究擬決不輕貸

歲暮通行停訟

爲通行停訟以安民生事照得使民無訟刑期
無刑固居官之媿蹟亦盛世之休風也南方習
俗囂凌凡有微隙小嫌動輒興詞告訐即使明
白問官片言折獄猶不免守候株連妨工廢業
之苦若遇不肖官員生事衙役需求詐索無所
不至即使發難之人健訟之輩未有不幡然懊
悔者茲當年歲荒歉米珠薪桂之秋况且時屆
隆冬民圖卒歲之日正宜省訟停刑與民休息

除本部院衙門見在出示停止不收呈狀外合
行通飭爲此牌行通省各司道府照牌事理卽
便一體遵照竝轉行所屬各官申飭凡民間告
理詞訟一概不得准理至來年二月方許准收
此本部院息訟安民至意慎勿故違取咎至於
佐貳擅受民詞屢經禁約在案諷司道府再行
通加嚴飭施行

申飭防範盜賊

爲嚴飭加謹防範以弭盜賊以安民生事照得
靖盜安民爲守土文武諸員專職若能平時加
意防備則穿窬何由竊發伏莽自然潛消况疎
防叅罰勒緝限期定例昭然不容寬假本部院
諄切告誡已不啻三令五申矣茲者歲聿云暮
又值災稜之餘保無饑寒迫切之愚民挺而走
險相聚爲盜者乎與其亾羊補牢蒙疎防責緝
之罰無寧先事預備謹緇繡桑土之謀合行嚴

飭爲此牌行通省各道府廳照牌事理卽便嚴
飭各該地方官保甲期于力行稽詰務須嚴謹
至于倉庫獄囚處所尤當倍加防範使盜賊潛
蹤小民安枕如或因循怠忽失事疎虞除逐案
查明照例

題請外定將溺職官員從重特糾重處不貸凜之
毋忽

賑恤貧生饑民

爲曉諭事照得年時荒歉歲序將終屢據貧生
饑民籲請賑濟前來情詞哀切殊可憫念本部
院擬捐俸貲酌量賑給合行曉諭爲此示仰各
貧生饑民知悉俱於本月二十四日齊赴本部
院轅門伺候凡係貧生俱令教官驗明正身聽
候當堂給發若係饑民俱於西轅門馬廐聚集
聽候委官按名散放至期候領之時爾等慎勿
擁擠喧闐致有失悞亦不得混冒重支辜負本

部院軫恤至意特示

查議編立都畝名目

為催徵既免地方之役編甲應除地方之名等
 事十二月十八日接仁錢等縣在城各鄉紳具
 揭前事到本部院為照編審里役一事定以三
 千畝編為十甲盡革見年糧長之名實行落甲
 催徵之法先經本部院通飭力行在案今各紳
 計慮若仍存都畝之名恐將來官役必致按畝
 而派以地方雜務故有改立區名編排字號之
 議此誠軫恤小民剔弊務盡之深意也但關係

地方永遠事宜合亟行查爲此牌仰該司照牌
事理卽便傳齊府縣各官會集鄉紳士民訂期
公議將揭內所稱日下攢造清冊每十甲名爲
一區編定天地等字號削去都督各目等語逐
一確酌妥當作何申飭頒行務期永絕官役派
擾之弊盡除里民雜役之累作速具文通詳以
憑酌奪施行萬勿游移遲誤有辜輿情未便

歲終禁飭夜行

爲嚴飭加謹防範以弭盜源事照得省會五方
雜處之區茲當餞臘更新之候誠恐奸徒乘機
竊發皆不可知除經嚴檄文武衙門各照原派
汛地無分晝夜加謹巡防本部院亦擬不時單
騎觀察外所有省城內外街市巷道原建柵欄
之處合行嚴飭爲此示仰各坊里甲人等知悉
每晚嚴督管柵人等以定更砲響之後將所管
柵欄卽行緊閉巡邏更夫周圍巡察或遇各衙

門緊急公務奉差員役執有印號燈籠或民間
生產急病執有十家牌者驗實方許放行其餘
一切夜行人等卽行拿解該地方官從重究懲
如司柵更夫敢有偷安懈弛啓閉非時或遇分
汛巡防各官及本部院親行所到之處定將違
玩夫役重懲枷示決不姑貸

燈夜申飭巡防

爲再飭巡防以靖地方事照得省會重地時屆
燈節恐有不逞之徒乘機竊發地棍營廝橫肆
搶奪殊干法紀合再嚴飭爲此牌行標下三營
各將照牌事理卽便委令守備千把各官查照
原派巡查汛地量帶兵丁四圍巡邏如遇奸宄
竊發及兵棍搶奪等事立刻擒拿解究或有烽
烟不測之處卽時救護消滅并禁乘機搶擄之
弊每晚至更深時候方止仍嚴諭各弁兵務須

加謹力巡不得懈弛疎忽如有縱容兵役生事
滋擾地方察出一併重究不貸

曉諭災免田糧

為彙報旱蝗異災情形等事照得浙省上年旱
災民不堪命本部院先據各屬申詳前來俱經
會同

撫院

題報請

蠲現准

部文覆奉

俞旨照例分別蠲免并將被災縣衛所屬地方出示

曉諭務使災黎均沾實惠仍取里民實免甘結
分送

部科查核等因准此本部院隨檄布都二司轉
行遵照并出示曉諭在案此係浩蕩

皇恩務使饑民均沾實惠誠恐不肖有司罔恤民隱
任役作奸將未徵在民者一概混徵已徵在官
者不准流抵甚或捏造甘結需索陋規使災民
徒有蠲免之名而無蠲免之實有辜

皇仁大干法紀合行出示禁諭爲此示仰官吏里民
屯丁人等知悉凡係原報旱荒田地悉遵定例
受災五六分者蠲免十分之一受災七八分者
蠲免十分之二受災九十分者蠲免十分之三
各照蠲免數目備具實免甘結繳送各縣衛彙
報諛司轉詳以憑咨送

科部查核倘有貪官污吏敢於悖

旨橫徵及借端需索擾累侵肥者一經訪聞告發官
卽先拿後叅奸胥立提處死斷不姑恕俱各凜
遵慎勿違忽

倘夫拿於於我者立此武氣以制不故怒身合

百謝謝及謝謝謝謝謝謝謝謝謝謝謝謝謝謝謝謝

謝查財財財財財財財財財財財財財財財財

財財財財財財財財財財財財財財財財

財財財財財財財財財財財財財財財財

財財財財財財財財財財財財財財財財

財財財財財財財財財財財財財財財財

財財財財財財財財財財財財財財財財

嚴飭緝拿搶奪兵棍

為嚴拿搶奪奸徒以肅法紀事照得杭城商民

輻輳往來如織訪有玩法兵丁冒營地棍搆聯

聚集潛伏街衢巷道之間每遇來往行人白日

攘奪貨物搜挖銀錢晚遇徒步孤身搶剝衣帽

彼傳此遞呼號莫救似此省會重地敢於橫行

無忌深屬非法但此輩結黨橫行則搶奪之物

必有潛踪窩頓之所若不設法嚴拿流害無所

底止合亟嚴飭為此牌行標下中軍副將照牌

事理卽便嚴飭原派擎牌巡察各官在於省城
內外商民來往人烟輳集通衢巷口密察存住
窩家緝拿搶奪兵棍連贓物一併獲解軍前以
憑重究不得僅以遊巡塞責或被別汛官兵拿
獲審出原獲地方定將該汛官兵一併軍法重
懲不貸

禁緝誑詐奸徒

爲禁緝詐僞奸徒以肅法紀事照得本部院奉
命制浙三載於茲凡屬地方戢撫兵民釐剔奸弊之
事刻意力行罔避勞怨當亦見諒于官紳士庶
矣惟是浙省五方雜處習俗澆漓奸詐易叢人
心莫測往如吳國士楊三才曹國昌趙培之褚
葵楊花臉等或以異籍而流毒誑財或以土棍
而害人撞歲或冒旗營而紮詐公行本部院一
有訪聞立繩大法此人所共知者也但恐無藉

之輩仍前行險徼幸骫法非爲與其行不教之
誅無寧爲先事之戒爲此示仰闔屬官民諸色
人等知悉本部院不聽關說不徇面情凡事親
裁竝無假手諸如刑名錢穀官評詞訟等類若
係順理成章者自然據情判斷秉公施行爾等
俱當靜聽裁奪不必枉費營求其或理短情虧
者法之所在斷難曲徇不特營求無益且愈增
罪責耳况邇來

功令倍嚴本部院關防最密耳目最近此後如有匪
人指稱衙門員役乞恩仕宦講情關說以及誑
騙招搖夤緣請託等事總係奸徒設局撞歲決
不能向法紀森嚴之地圖僥倖於萬一也倘不
信誠諭仍前妄行或被人告發或廉訪有據定
將行財受賄居停包攬之人一併嚴拿重責四
十板枷號兩箇月仍發法司衙門照依光棍
新例分別絞遣治罪關係職官者先拿後叅一體追
擬俱不輕恕各宜諦聽凜遵毋得自蹈法網各
諛巡捕官役務須不時緝訪獲解不許徇縱致

于併究不貸

酌議都圖字號

爲催徵旣免地方之役等事據布政司呈詳前
事到本部院隨批編審里役一事關係民生休
戚必將意義講究明白方能永行無弊如減畝
併里各屬已經編定但初意原爲省減田畝之
徭役使里民田均而力合其舊額地丁銀糧數
目毫無虧損若誤認爲減削版畧則非矣此均
田併里之義所當講明者一也又如落甲催徵
初意原欲盡革見年糧長之名使各甲各自完

糧免受頑民拖逋責比之累今各縣雖稱奉行
尚未見有實效須再加申飭止許摘比頑戶不
許圈比甲總若縣官行之不善以致混比甲頭
胥差紛擾是十年一次值役之糧現今反爲年
年應比之甲戶爲害轉甚矣倘有故違混比者
官叅役究決不輕徇此落甲催徵之義所當講
明者二也再如雜派差徭責成地方之說查人
命事情自有兇身苦主及在場証見之人盜賊
事情自有失主及貼近四隣迯人事情自有窩

一主隣佑與十家長失火事情自有火頭勾攝人
犯自有犯屬釘樁建柵守柵等事自有居住本
處之人俱不必干涉里甲他如攢造烟戶牌冊
田地冊籍之類自有坐地版籍人戶間有軍需
人夫之類止須總甲承催其餘私派不經名目
久奉

嚴旨禁革總與里甲毫無干涉此雜泛差徭之義所
當講明者三也今二縣申文暗串鄉總保甲四
字司府不察而併及焉是欲僉報鄉約責備保

長別立一樣名色以代糧現雜役之派以遂官
役詐擾之私所當嚴加禁飭斷斷不許踵弊貽
害者也以上三義既明而後編立字號之說可
得言之閱鄉紳士民意欲改都爲區之意蓋恐
日後官役按畝派擾雜務耳但杭屬原名都畝
者改以區名而浙西原名爲區者不能改也且
有司之賢而卹民者雖都畝仍舊而雜派可無
若有司之不肖者總改區名亦不妨違悖禁約
而按區以派也語云有治人無治法特以身膺

民事故不得不講求立法云爾本部院擬將編
定三千畝爲一里之都畝於每都下編註天地
一二等字號按此字號止令落甲催納錢糧不
許派及地方雜務其落甲催徵之法與火盜人
命逃人等事悉如前說嚴飭力行則里民不致
貽累而紳士之輿志咸孚矣應否如此諛司再
一酌之至於已銷都畝革除各蠹如有鑽營復
燃如嘉興情弊者訪實嚴拿重處不得輕縱其
黃冊達

部之說查黃冊久經停止可無置議即使再有奉行自應查照舊式悉按實額丁田戶口臨期酌量攢造此時不必先行咨部致滋窒礙之端總之今日所行乃是均田併役從寬卹里民差徭起見其於地里版圖按籍而稽竝無譌缺俱無庸長顧遠慮者也仰司再加覆酌妥當一併確議通詳以憑批奪仍候撫院批示行繳等因批發去後合行知照爲此牌行杭州府仁錢二縣一體遵照施行

催議江干建亭事宜

爲創建江亭永貽利涉事據杭州府申詳銀杏埠建亭緣由到本部院據此除批錢江橫渡常有風濤之險往年頻頻疎失雖因舟子射利行人孟浪所致亦緣天時人事之不齊也據議建亭江阜設菴贍僧以爲行旅憇宿之所庶無非時競渡之虞又議懸鐘警覺遇風止渡不惟永利問津抑免無知悞犯具見諛府畱心民事籌畫周到其應行勸募舉劔事宜仰布政司確酌

妥當具文通詳以憑會議定奪當勿因時絀舉
羸姑置之謀同築舍也于新正望前速報等因
批行去後事關利濟未便久延合亟行催爲此
牌行藩司查照先今事理速將銀杏埠建亭設
菴贍僧等事宜速行查議妥確具文通詳以憑
會奪毋再濡遲速速

再布告期條約

爲禁約事照得南方風俗虛囂士民逞刁健訟
本部院諄切誠諭已不啻三令五申矣今二月
初二日屆當放告之期若概行停止則恐小民
冤抑不得上達若不加禁約又慮奸徒駕欺罔
之詞訟棍造迷瞞之謊使良民枉受陷害胥役
藉爲生涯甚非本部院息訟安民之至意也合
行禁諭爲此示仰闔屬呈狀人等知悉嗣後每
遇告期除照本部院原頒狀式內各款遵行外

更須查照今示後開各條一體遵守倘有故違
禁約者或臨時分別責懲或審明按律治罪法
在必行斷無寬假特示

計開

一人命強盜機密重情劣弁悍兵貪官惡蠹
土豪勢惡等項下司難治之事方許據實
直書具狀投告其餘戶婚田土鬪毆錢債
細務應赴有司告理一概不許混瀆如有
以小事舊事捏駕重情裝詞誑准者雖非

全誣亦必懲處若審係誣告者定行照例
反坐弁提代書重究不貸

一所投之詞如係條陳利弊申訴冤枉者許
用白紙呈詞仍每詞照書副呈一張以備
存案其餘凡係告列犯証姓名者俱用狀
格填寫若呈詞無副呈或告人而用白頭
呈紙者及告詞無副狀或狀內雙行夾寫
字逾格眼者雖係實情概不准理

一匿名呈狀告言人罪者審出依律治罪若

條陳利弊而假捏詭名者與訐告被犯而
違禁粘款者或籍貫住址不明或婦女幼
稚不列抱告或狀內不寫代書及雖有代
書姓名而無的確住處或外籍之人不寫
歇家或非姦盜叛逆而牽連婦女或被告
過四人干証過二人或被盜不列失單或
年月混寫本年本月諸如此類一概不准
一告人背黃抹頸撒潑逞刁者或家有壯丁
而攙扶婦女稚子膚慙者或原係一己私

情而捏開地方公舉多人者或一人而身
帶呈狀數紙者或無藉棍徒受人雇倩包
告者或被告原非衙門員役而誣捏聳聽
及狀內不明寫某衙門某項官弁兵役而
混列朦朧字樣者此等俱係刁惡之尤本
部院于喚審之時問出實情除原詞毀棄
不准外定將本犯分別責懲枷號并拿代
書重治决不輕饒

一違禁越訴者已經問結而再告翻案者已

批衙門不赴候審而投催投訴者或妄請
吊卷併批者或斷追給主發落等事不向
承問衙門催呈又來混竈者此等呈詞一
概不准
一每月初二日放告一次其餘日期概不收
准如有轅門喊冤沿街瀆擾者巡捕員役
立行驅逐倘有刁民故違不遵恃頑撒潑
定行拿究不恕

春汛申飭沿海

爲特飭巡防以固海疆事照得詰奸固圍爲地
方文武諸員耑責故內嚴保甲外謹巡防不可
一日偏廢若稍有懈弛或奸民偷渡或逆踪飄
突貽悞封疆有乖職守所關匪細是以本部院
日申月誡不啻諄切試思海禁

功令一有奸民透越文武失察者革職通同者重罪
至若縱賊登犯坐失事機此更

國法之所難貫矣卽如日前海寧蕭山二縣奸民

胡斗樞陳君相等置買貨物意圖出洋旋經事
露本部院飛疏

題叅見奉

嚴旨將二縣印官革職提問此更前車失察之明驗
也茲者春風日勁漁汛屆期保無外侮伺隙窺
犯愚民嗜利偷越之事若不預爲綢繆事後補
牢何及合亟申飭爲此通行沿海文武各衙門
照依事理卽便嚴飭所轄將領弁兵各按派撥
營汛加謹偵防遇寇則傳烽飛報有奸卽星逐

追拿弁飭行所屬各縣不時稽查保甲慎察嚴
防如有跡涉可疑務必窮究明白毋許一船近
岸毋許一人偷越遇有賊踪情形奸民消息立
卽移會隣汛官兵合力堵剿弁飛報本部院軍
前以憑調度追擒敢有瞭防不密縱奸不獲或
被別屬獲報或被春汛出洋官兵擒拿審訊得
實定將諛屬疎防文武各官先拿後叅立置重
典决不輕宥各宜凜遵毋得玩忽

通飭修築隄防疏濬水道

爲東作方殷乘時預修水道以備蓄洩以利農業事據杭州府詳稱竊照杭郡連年旱澇相仍民不聊生皆因各屬河道不疏閘壩陡門淤阻淺塞以致遇旱放水不入遇澇放水不出且武林地勢西北山高爲水脈來龍源泉溪澗俱趨東南下江目今雖屢奉嚴檄查通水利皆以官河無阻便可塞責究竟各屬閘壩陡門溝洫久不疏通地脈壅滯故旱澇乘之今當初春東作

之時小民亟宜挑濬溝閘橋門以備蓄洩伏懇
嚴飭各屬一縣之中凡關水道某處宜濬某處
宜築細加查核曉諭士民協力疏通各將本縣
修過水利共計幾處備開清冊具報憲臺查考
裨益不淺等因到本部院據此爲照修築隄防
疏通水道所以備旱澇而利田禾也是以各屬
通判印官俱有水利之責務必疏濬得宜庶幾
溝洫攸賴年來浙省水旱頻仍閭閻失望皆緣
各屬蓄洩無方以致遇澇則瀰漫莫放遇旱則

車戽無從今當東作之候正宜及時開濬不獨
杭州一處爲然照據前因合行通飭爲此牌行
藩司各道府廳照牌事理即便確查某縣某處
閘壩陡門有無淤塞今應作何開導以洩水路
某處陂堰塘隄有無坍塌今應作何修築以蓄
水源速行查勘明確設法處置務期力行以觀
成效至於民間田地溝塍更宜曉諭修治均利
樂土但不許藉口踏勘縱役索詐反滋民累如
違察出取究未便仍將諛屬縣疏通修築某處

若干具報查考施行

申飭操練水師

為春汛出洋將屆舟師練習宜精特飭配演以重軍務事照得沿海島嶼奉

旨每年春秋二汛各鎮總兵官親統官兵出洋搜剿業經遵行在案照今春汛及期又當照例舉行但配搭舟師操練士卒派撥戰艦調度兵將俱當預為整備聽候示期進發如該鎮見在戰船哨船應統若干出洋酌留若干居守每船配兵幾何應需器械多少某處隘口險要調遣何營

官兵守禦各船捕舵水手作何查驗訓練至於配船官兵更宜先行操演熟習駕使利便始可破浪衝鋒搜剿必克合亟飛飭爲此照會各鎮查照照會事理速將前指諸項事宜逐一酌調妥當所有配搭出洋官兵卽日登船操演餞使務期精練熟習限文到二日內星速具文馳報以憑酌奪示期出洋搜剿軍務重大萬勿遲延違錯致干未便

通飭各屬詞訟

爲嚴飭詞狀夤准夤銷以靖訟源以培民俗事據杭州府呈詳請飭各屬詞訟不許濫准夤銷緣由到本部院據此爲照浙省風俗澆漓刁險之徒每每工於構訟凡告一詞無論口角小隙戶婚田土駕起最大題目報洩私忿之外又必羅織無辜殷懦多人或贅詞尾或牽証佐兼之問官聽斷不公衙蠹乘機詐騙不查事之有無干涉或平素知其家業殷厚者擇而食之上而

貪官下而書差蠹役指詐多端是訟未終而無辜之身家早已破矣是以本部院申飭不許濫准詞訟之文不啻五申三令夫何復有愍不畏死之徒敢于峻聳作奸詐害良善今據前因除佐貳各官不許擅受民詞先經本部院屢檄嚴飭務須着實遵守外合再通行申飭爲此牌行各衙門照牌事理嗣後凡係自理詞狀務須當堂訊明情詞確實者方許審理如係駕情砌隱羅織無辜及牽連婦女者一概不許准行至於

行提人犯或着原告拘喚或令總甲攝提不許濫差衙役凡干証有不願出官者許據實寫出此事竝無干涉交與行拘之人不必到官再如兩造不願終訟情甘銷結者聽其具呈卽行准銷存案不許事外苛求以致日久拖累敢有訟棍與滅自由關說詐害及應銷而貪官衙蠹指勒不銷者或有訪出或被告發定將本官立時糾叅蠹役處死決不姑恕

禁飭捕快私拷誣良

爲仰遵憲檄嚴究捕役飛燒再請禁飭以安民
生事據杭州府詳稱海寧縣捕役誣詐良民見
經懲處弁請通查申飭緣由到本部院據此爲
照捕役誣良爲盜指詐飛燒爲害最烈大凡人
家一經盜劫勢必經由此輩躡緝無論盜之真
假一獲到手抄捲橫行不但失主之贓物隱匿
無遺卽平素無主盜贓家私物件靡不一網打
盡甚至平素殷儒之家有覬覦未遂者指使誣

板擇人飛食非刑私拷命繫懸絲飽其慾則真賊可以賄免拂其意則無辜陷入網羅似此極惡窮兇言之令人髮指本部院先經屢檄申飭在案今據該府申詳前情合再通行嚴飭爲此牌行各道府廳縣照牌事理嗣後凡有盜賊生發一經捕快拿獲卽送府捕縣印正官先訊各盜捕役曾否私刑弔拷有無指使供扳無干之人問明然後據情研究審出真正盜窩受贓之家同夥真盜密行捕官會同諛汎防弁責令總甲里隣認拿究審敢有好捕蠹快串同地棍總甲借端抄詐陷害無辜私刑弔拷等弊或訪聞得實或告發有據捕快立拿處死縱蠹之諛管官先拿後叅決不姑饒各宜凜遵毋貽後悔

春汛再飭海防

爲再飭加謹備禦以重海防事照得沿海一帶
申嚴汛守稽察奸民先經本部院特檄飛飭在
案但今春汛及期南風日勁或賊鯨伺隙突犯
或愚民乘機透越皆宜預爲防範且官兵出洋
在卽又恐海內亾命賊徒望風登陸潰突若將
弁不整擻臥戈官吏不稽奸誥究一有貽悞匪
特自干叅罰抑亦封疆關係合再通行飛飭爲
此牌行各道將府廳查照先今事理卽便轉行

所轄凡屬汛守險要臺寨關津無分風雨晝夜
務須刻刻隄防一有警息立即聲援夾剿戮力
堵禦倘遇奸民犯界出洋會同發兵追剿必期
人贓全獲解赴本部院審實定行分別獎薦如
或懈弛疎忽以致失機縱奸及臨事推諉別屬
隣汛事發隱匿不報察出先拿後叅耑汛將弁
立正軍法諛道府廳縣仍不時親查保甲察訪
奸徒但不許借端捏造妄陷詐害如違一併叅
究先具各遵依繳查俱毋違錯

勸輸賑濟衢屬饑民

爲米價驟貴饑民流亾謹陳末議籲憲拯救事
據金衢嚴道詳請動支積穀賑發饑民并勸諭
捐輸湊濟緣由到本部院據此爲照衢屬上年
災傷較之他郡獨甚本部院軫卹有心補拯鮮
術除經批行諛道如詳作速料理詳報飭行并
見在運米平糶設法賑濟外第恐饑民衆多設
處有限自非廣爲勸助不能普濟均沾合再出
示曉諭爲此示諭諛郡官紳士民人等知悉務

須軫念災傷共襄義事無論多寡悉聽樂輸以
期積少成多衆擎易舉至于募收設賑之法或
推鄉耆分理或附官廠總施期于利濟始終幸
勿坐視中撤事完之日仍聽諛府縣造冊彙報
以憑分別獎勵施行倘有奸徒借端阻撓及乘
機射利騷擾等弊許地方人等指名呈稟所在
有司審實詳究不貸

措置獄舍事宜

爲嚴飭獄務事照得囹圄縲紲所以拘繫有罪
如情真罪當者固當審勘確實而後明正典刑
若其間情輕末減之犯株連待辯之人當諷官
吏自宜加意看管俾之生全以體

朝廷好生之德以盡民上典守之心今本部院披閱
臬司及杭府兩縣申詳人犯患病病故之文殆
無虛日日每數件雖因時值艷陽災沴發越亦
緣官役照管不周獄舍逼窄汗穢有以致之若

文樓 卷六
不嚴飭料理使犯人一拘黑索遂化青磷則淹斃事犯既于

功令有干而視死不救抑亦良心難昧合亟查飭爲此牌行臬司府縣照牌事理除仁和縣監見在蓋造務須剌期完工以便搬移外務各卽日親詣諛管監獄羈候處所逐細看視如牆垣必須堅固扁鑰必須慎密自不待言其所住房屋門牖務要齊備椽瓦務要完全地址務要乾燥笆壁務要遮蔽又每數間天井院落之處必使透

露風日之氣若有上漏下濕傾圯倒敗去處卽行收拾整補至於臥宿之所酌量人犯多寡分別安頓務令足以展舒最切要者溷廁地方更要處置妥當若聽其隨處便遺則臭穢薰蒸極易染病今宜安設坑廁數處并置溺桶數十箇仍責令禁卒每過十日半月出脫一次其蔓草汗穢亦令不時掃除以上應諛措置處所事務諛管官于看視之時卽便登記一摺或指示獄官或分付吏役務使記認明白限半月內料理

完備計算所費銀錢無多諛司府縣卽捐資收
拾亦是方便好事若或以無措爲辭不妨據實
開明應用數目具文申報以憑本部院設措捐
發通完之日仍候本部院不時親臨查閱或委
官勘驗倘或故違不遵仍前玩視定將本官記
過獄官戒飭吏卒責懲決不寬恕又每日人犯
飲食有家屬親戚者聽其供送止許搜檢防閑
不許畱難阻滯若無送飯之人須將僧人所擔
監粥均勻分給毋使失時斷絕應需水漿着令

禁子取給敷用設遇疾病立撥醫生看視治以
湯藥不得遲悞直待病勢沉重方纔呈報塞責
至于牢頭獄卒凌虐詐害等弊諛管官時加體
察如有違法妄行者立拿重處毋得姑貸此係
整飭刑獄要務故本部院不憚瑣細娓娓詳言
倘諛管官嫌憎穢觸或謂若輩自作自受何必
哀矜此等心腸最是傷天害理不思愚民犯罪
皆由官司教化未行所致乃居官者軒冕華膺
片刻之頃尚且憎嫌疎懶不能禁受若輩遭刑

文檢 卷六
罰之後處患難之餘憂愁恐懼交構于中淦戾
饑寒感觸于外安得不深疾而歿乎抑安可不
設身而觀乎天堂地獄卽在眼前因果業緣總
由心上願各留意毋忽

禁比見年甲頭

爲再飭徵糧規則以恤里民事照得徵糧概用
滾單盡除現年糧長之名實行落甲催徵之法
先經屢次飭行在案蓋欲甦恤里民使免受刑
比之累也若不用滾單不分良淳一概混提比
較是昔時止比現年今反通比各甲豈立法之
初意乎今訪聞各屬有將甲頭不論完欠混行
提比者甚有公然牌示仍輪現年勒令帶同各
甲頭赴比者以致里戶刑責不免胥差詐索橫

行違禁厲民莫此爲甚除現在訪實叅拿外合
亟嚴飭爲此牌行藩司諒府照牌事理卽便嚴
行各縣再加申飭凡徵納錢糧規則務須實行
落甲滾單之法挨次輪催聽民完納若係真正
頑戶違限逋抗者方許摘名提比仍嚴禁胥差
勒索等弊敢有仍前混立現年名色及將甲頭
混提比較者諒司府立將印官職名據實揭報
以憑叅處并拿經承從重究治斷不輕恕萬勿
徇庇失察致干併咎未便

酌頒易知小單

爲查議頒發易知小單便民輸納事照得各屬
徵收錢糧見經飭行落甲催徵之法革除糧見
之名又經每戶頒給簡明小單便民完納以杜
包頭里蠹之害務期經久可行近據各屬申送
滾單簡明小單式樣止列花戶完銀比限而田
地山蕩科則每畝應徵銀米細數多不載入鄉
民雖領單到手而完數茫然卽有違
部易知由單止開每畝額徵銀若干額徵米若

干殊不知額銀之外尚有收零孤折等銀每額銀一兩須加徵銀幾分幾釐額米之內有行月南糧等米每額米一石須派幾升幾合尚未分晰明白所以每當開徵之時諛縣仍有收零孤折行月等糧各項派徵名色民間既無每畝應完細數必須求問里歇里歇又須求問房科名目做數及視所做之數仍是逐戶結總而每兩每石應加應派之源流終不條分縷晰所以每逢一限定須另做一數小民既不深悉其中源

委不得不聽憑胥役指揮但一經此輩之手而包攬兜收私徵暗派之積弊遂不可禁遏是名雖禁革里歇而其弊終不能盡除也合行發式查議爲此牌行藩司照牌事理卽將發去擬定仁和縣易知小單一紙諛司細加查核如有應增應減之處卽行酌議妥當并酌量應否通行各屬照式刊行遵照或今年已給小單俟下年行之亦可再查每年採買本色增減時價勢難同由單預定不妨於本年三月內俟本色價定

之後核定畫一通行刑發但不得借名科派故意遲延反滋民害事關民生利弊諛司務須查議妥確具文通詳以憑核奪毋得汎視

計發單式一紙

考試觀風

爲觀風事照得兩浙人文之藪本部院任叨總制例得采風但緣向來戎馬倥傯未暇課文講藝今值大比之歲擬合循例舉行爲此牌行各府照牌事理即便轉行所屬府學及各州縣印官暨儒學教官一體遵照將本學內文行兼優青年有志諸生俱聽報名赴考其儒童文學精通者亦准酌量附試仍嚴飭各教官若諸生內有先今考試劣等被黜或緣事除名者務須查

檢明白不得濫冒混報其文字俱以醇正典雅
爲貴文到之日一面出示曉諭一面訂期考試
府學與附郭縣學生儒俱屬該府親考外縣各
學委令各縣印官監考考畢照例編號彌封造
冊具文連卷解府該府彙齊俱限五月以內解
送本部院以憑校閱批評分別等第出案激賞
發去釘封題目慎密收藏臨考拆閱不得假手
以防漏泄合用供給等項照例動支府縣存留
備用銀兩俟事完具詳報銷施行通勿違悞

